



TAMBULIG NGA TIKANG HA KAHITAS-AN

TINIROK

NI WATSON GOODMAN

DIRI BALIGYA

An “Tambulig Tikang ha Kahitas-an” amo in tinirok nga mga bersikulo ha Bibliya nga gin-urusa sumala han mga ulohan nga iginsasaysay. Natuo ako nga an Bibliya amo ngahaw an giupayi nga komentaryo han Bibliya.

“Tinnikang ha kahitas-an” an Pulong han Dyos ngan makakabulig gud ini hin mga kasingkasing nga ginugutom ngan inuhaw han kamatuoran. Mapadayag an Ginuo ha tawo ngan mahatag han iya kalipay ug kamurayaw ha tumutuo, dida ha pagbasol han tawo, pagbaya han iya sala, pagpasulod kan Jesu-Cristo ha iya kinabuhi, ngan ha pagtuo niya kan Ginuo Jesu-Cristo nga iya magtaralwas ha bug-os niya nga kasingkasing. Gin-agian ko ini hadton tuig 1937, ngan tikang hadto waray ko na gud utda ini nga urusahon nga pakig-angbitay han Ginuo. Sanglit gindadasig ko ikaw pagtubyan kan Jesu-Cristo nga imo Magtaralwas ug Ginuo. Buhata ini YANA kon waray mo pa pagbuhata ini. — Watson Goodman

AN GUGMA HAN DYOS

1

Juan 13:1

Bisperas na adto han Pyesta han Paglabay. Maaram na hi Jesus nga inmabot na an iya tak-na pagbaya hini nga kalibutan ngan pagkadto han Amay. Gin-higugma niya pirme an iya mga sakop dinhi ha kalibutan, ngan ginhigugma niya hira tubtob gud ha kataposan.

Padayag 1:5

Ngan tikang kan Jesu-Cristo, an matinumanon nga saksi, an subag nga Anak nga lalake nga ginbanhaw, nga amo man liwat an punoan han mga hadi han tuna.

Juan 3:16

Kay ginhigugma gud han Dyos an kalibutan, nga iginhatag niya an iya bugtong nga Anak, basi diri unta mamatay an ngatanan nga nasarig ha iya, kundi ma-kaangkon han dayon nga kina-buhi.

Jeremias 31:3

Han pag-ungara hin pahuway han katawhan han Israel, 3 pin-makita ako ha ira ha hirayo. Katawhan han Israel, pirme ako naghigugma ha imo, sanglit nag-papadayon ako pagpakita ha imo han akon dayuday nga paghi-gugma.

2 AN PAGKADYOS NI JESU-CRISTO

1 Timoteo 3:16

Waray makakaglirong han pagkadako han tinago han aton tinuohan! Pinmakita hiya ha hit-sura hin tawo, iginpakita nga matadong pinaagi han Espiritu, ngan hinkit-an han mga anghel. Iginwahi hiya ha mga nasod, gintuohan ha kalibutan, ngan gimbayaw ngadto ha langit.

Juan 14:9b, 10

“ . . . Nakakita na han Amay an bisan hin-o nga nakakita ha akon. Sanglit kay-ano nga nasiring ka, ‘Ipakita ha amon an Amay?’ Diri ka ba natuo, Felipe, nga aada ako han Amay ngan an Amay aadi ha akon?” Nag-

siring hi Jesus ha iya mga tinunan, “Diri natikang ha akon an mga pulong nga iginhimangraw ko ha iyo. Nagbubuhat an Amay nga aadi ha akon han iya kalugaringon nga mga buruhaton.

Juan 1:1 ug 14

Han waray pa bihimoa an kalibutan, nakada na an Pulong. Kausa han Dyos an Pulong, ngan Dyos gud an Pulong. . . Nahimo nga tawo an Pulong, ngan nagukoy tampo ha aton. Hinkit-an naton an iya pagkagamhanan nga puno hin gugma ngan kamatuoran. Amo ini nga kagamhanan an kinarawat niya han iya pagkabugtong nga Anak han Amay.

Lukas 1:35

Nagbaton an anghel, "Makun-sad ha imo an Espiritu Santo, ngan magpapabilin ha imo an gahom han Dyos. Tungod hini, tatawgon nga Anak han Dyos an baraan nga bata.

I Juan 4:15

Nag-uukoy dida ha Dyos an bisan hin-o nga nagpapahayag nga amo hi Jesus an Anak han Dyos, ngan nag-uukoy man an Dyos dida ha iya.

Isaias 9:6

Natawo ha aton in bata! Igin-hatag ha aton in anak nga lalake! Tatawgon hiya nga "Makinaad-

mananon nga Magsaragdon," "Gamhanan nga Dyos," "Amay ha Kadayonan," "Hadi han Kamurayaw."

Mga Taga Colosas 2:9

Kay nag-uukoy dida kan Cristo, ha iya pagkatawhanon, an kabug-usan han dyosnon nga kinaiya.

Mateo 17:5

Han nagyayakan pa hiya, li-nindungan hira hin masilaw nga dampog, ngan nagsiring in tingog tikang han dampog, "Amo ini an akon kalugaringon nga Anak nga hinigugma, nga akon nalilipayan gud. Pamatii niyo hiya!"

4 NAGSUMAT HA ATON HI JESUS KON HIN-O HIYA

Juan 10:7

Sanglit nagsiring liwat hi Jesus, “Susumatan ta kamo hin tinuod: Amo ako an purta han mga karnero.

Juan 6:35

Nagsumat hi Jesus ha ira, “Amo ako an pagkaon nga nahatag han kinabuhi. An napakadi ha akon diri na gud gugutomon; ngan an nasarig ha akon diri na gud uuhawon.

Juan 13:13

“Gintatawag ako niyo nga Magturutdo ngan Ginuo, ngan matuod ito, kay amo gud man ako.”

Juan 8:58

Nagbaton hi Jesus, “Susumatan ko kamo hin tinuod: Han waray pa katatawo hi Abraham, ‘Amo-na-Ako!’”

Juan 11:25

Nagsiring hi Jesus ha iya, “Amo ako an pagkabanhaw ngan an kinabuhi. Mabubuhi an bisan hin-o nga nasarig ha akon, bisan kon mamatay hiya.

Juan 8:23

Nagbaton hi Jesus, “Tikang kamo dinhi ha tuna, kundi tikang ako ha langit. Tikang kamo hini nga kalibutan, kundi diri ako tikang hini nga kalibutan.

MGA MILAGRO NGA GINHIMO NI JESUS 5

Mateo 20:30 ug 34

Nakabati in duha nga buta nga nalingkod ha ligid han dalan, nga naagi hi Jesus, sanglit nagtikang hira pagguliat, "Anak ni David! Kaluoyi gadman kami, Sir!" . . .Naluoy hi Jesus ha ira, ngan ginkamkam an ira mga mata; dida dayon nakakita hira, ngan sinmunod hira ha iya.

Mateo 14:19-21

Pinapanlingkod niya an mga tawo ha kabanwaan; kinuha niya an lima nga tinapay ngan duha nga isda, ngan hinmangad hiya ha langit pagpasalamat han Dyos. Ginpinitpinit niya an tinapay ngan iginhatag ha mga tinun-an,

ngan igindurot ito ha mga tawo. Nangaon an ngatanan ngan nagkabubusog. Katapos, gintirok han mga tinun-an an mga salin nga nakapuno hin dose ka alat. Lima ka yukot nga kalalaken-an an nangaon, labot han kababayen-an ngan han kabataan.

Lucas 5:5, 6

Binmaton hi Simon, "Agaron, nagkabudlay kami ha bug-os nga gab-i, ngan waray gud kami nadakop. Kundi kon amo man an imo siring, itutunod ko an mga pukot." Gintunod nira an mga pukot, ngan nakadakop hin damo hin duro nga isda, nga haros magisi na an mga pukot.

6 MAGHIRIMO UG GINUO HI JESU-CRISTO

1 Mga Taga Corinto 1:9

Kasasarigan an Dyos nga nag-tawag ha iyo nga magin kausa han iya anak nga Jesu-Cristo nga aton Ginuo.

Mga Taga Roma 14:9

Kay namatay ngan nabanhaw liwat hi Cristo, basi magin Ginuo hiya han mga buhi ngan han mga patay.

Mga Taga Colosas 1:16

Kay pinaagi ha iya ginhimo han Dyos an ngatanan didto ha

langit ngan dinhi ha tuna, an kinikita ngan an diri kinikita nga mga butang, lakip an gahom nga espirituhanon, mga ginuo, mga punoan, ngan mga magburuot. Pinaagi ha iya ngan para ha iya, ginhimo han Dyos an ngatanan.

Juan 1:3

Gintuha han Dyos an ngatanan nga mga butang pinaagi han Pulong. Sanglit waray nahimo nga bisan usa han ngatanan nga binuhat, nga diri pinaagi ha iya.

HI JESU-CHRISTO AMO AN MAGHUHUKOM 7 HAN NGATANAN

Mateo 25:32

“Ngan pagtitirokon niya ha iya atubangan an ngatanan nga katawhan han tuna. Niyan, pagbabahinon niya hira hin duha ka pundok, sugad hin paramangno hin mga karnero kon ginlalain niya an mga kanding tikang han mga karnero.”

Mga Taga Roma 14:10

Sanglit ikaw, kay-ano nga naghuhukom ka han imo bugto? Ngan ikaw, kay ano nga nagtatamay ka han imo bugto? Matindog kita ngatanan ha atubangan han Dyos, basi paghukman niya.

Mga Taga Roma 2:16

Sanglit, sumala han Maupay nga Sumat nga akon iginwawali, amo ini an mahinanabo hadto nga Adlaw, kon an Dyos, pinaagi kan Jesu-Cristo, maghukom na han ngatanan nga tinago nga mga panhunahuna han mga tawo.

2 Timoteo 4:1

Gin-aaghat ko ikaw ha atubangan han Dyos ngan ni Cristo Jesus nga maghuhukom han ngatanan nga mga tawo nga buhi ngan patay, ngan tungod han iya pag-abot ngan han iya Gin-hadian, nagsusugo ako ha imo.

8 KATALWASAN PINAAGI LA KAN CRISTO

“Amo ako an purta. Matatalwas an bisan hin-o nga masulod pinaagi ha akon; masulodgowa hiya, ngan makakaagi hin panibsiban.” — Juan 10:9

Juan 8:24

“Sanglit nagsiring ako ha iyo nga mamamatay kamo dida han iyo mga sala. Ngan magkakamatay kamo dida han iyo mga sala kon diri kamo tumuo nga “Amo-Ako-Hi-Ako”.

1 Mga Taga Tesalonica 5:9

Waray kita pilia han Dyos basi mag-antos han iya kapungot, kundi basi angkonon naton an katalwasan pinaagi han aton Ginuo Jesu-Cristo.

Mga Hebreohanon 5:9

Han kahingpit na niya, nahimo hiya nga burabod han dayon nga katalwasan para hadton ngatanan nga nagsusugot ha iya.

Juan 14:6

Nagbaton ha iya hi Jesus, “Amo ako an dalan, an kamatuoran, ngan an kinabuhi; waray nakakakadto han Amay kon diri pinaagi ha akon.”

Mga Buhat 4:12

“Hiaagian an katalwasan pinaagi ha iya gudla. Kay waray na lain nga ngaran ha bug-os nga kalibutan, nga iginhatag han Dyos ha mga tawo, nga sedang makatalwas ha aton.”

KATALWASAN PINAAGI LA KAN CRISTO 9

Padayag 5:9

Nagkanta hira hin bag-o nga kanta: "Takos ka magkuha han linikid nga basahon ngan mag-abre han iya mga silyo. Kay ginpatay ka, ngan tungod han imo kamatayon ginpalit mo an mga tawo para ha Dyos, tikang han tagsa nga tribo, pinulongan, nasod, ngan katawhan.

Mga Taga Colosas 1:12-14

Ngan pagpasalamat kamo hin malipayon han Amay nga nag-himo ha iyo nga takos umang-bit han igin-andam han Dyos para han iya mga pinili didto

han ginhadian han kapawa. Gintalwas kita niya tikang han gahom han kasisidman, ngan ginbalhin ngadto han ginhadian han iya hinigugma nga Anak, nga pinaagi ha iya gintalwas kita, nga ha aton pa, ginpasaylo an aton mga sala.

1 Mga Taga Corinto 1:30

Kundi gindara kamo han Dyos ha pakigkausa kan Cristo Jesus, ngan ginhimo han Dyos hi Cristo nga magin aton kinaadman; pinaagi ha iya, gin-ispis kita nga matadong ha Dyos, nagin baraan kita nga katawhan han Dyos, ngan natalwas kita.

10 PAGTUBOS PINAAGI HAN DUGO NI CRISTO

Mga Hebreohanon 9:14

Tungod nga matuod man ini, darudako pa gud an mahihimo han dugo ni Cristo! Pinaagi han dayon nga Espiritu, iginhalad niya an iya kalugaringon sugad hin hingpit nga halad ngadto ha Dyos. Maglilinis an iya dugo han aton mga pagbati ngan panhunahuna tikang han waray pulos nga mga buhat, basi makagalagad unta kita han buhi nga Dyos.

1 Pedro 1:18, 19

Kay sayod man kamo kon ano an ignbayad niya pagtalwas ha iyo tikang han waray pulos nga paagi hin kinabuhi nga iyo

ginsunod tikang han iyo mga kaapoy-apoyan. Diri salapi o bulawan nga nawawad-an han iya kamahal an iya iginbayad, kundi ginlukat kamo pinaagi han hamili nga dugo ni Cristo nga iginhalad sugad hin halad nga tinubod nga nati nga karnero nga waray dum-it o mantsa.

1 Juan 1:7

Kundi kon nagkikinabuhi kita ha kapawa — sugad gud nga aada hiya ha kapawa, dida hito may pakig-angbitay kita ha usa kag usa, ngan naglilinis ha aton tikang han ngatanan nga sala an dugo ni Jesus nga iya Anak.

KATALWASAN PINAAGI HIN PAGTUO KAN CRISTO 11

Mga Taga Roma 5:1

Yana nga gin-isip na kita nga matadong ha Dyos pinaagi hin pagtuo, maupay na an aton rilasyon ha Dyos, pinaagi han aton Ginuo Jesu-Cristo.

Mga Taga Efeso 2:8, 9

Kay pinaagi hin pagtuo natalwas kamo tungod han mahigugmaon nga kaluoy han Dyos. Diri ini iyo kalugaringon nga buhat, kundi hatag gudla han Dyos. Waray niyo dinhi sadang ipanhambog, tungod nga diri ini bunga han iyo kalugaringon nga mga buhat.

Juan 6:28, 29

Sanglit nagpakiana hira ha iya, "Ano man an sadang namon buhaton basi makatuman kami han mga ipinapagbuhat ha amon han Dyos?" Nagbaton hi Jesus, "Amo ini an karuyag han Dyos ipabuhat ha iyo: Sarig kamo han iya ginsugo."

Juan 20:31

Kundi iginsurat ini, basi tumuo kamo nga amo hi Jesus an Mesiyas, an Anak han Dyos, ngan pinaagi hini nga pagtuo, makaangkon unta kamo han kina-buhi ha iya ngaran.

Lamentaciones 3:22, 23

Nagpapadayon pa an kanan Ginuo dayuday nga paghigugma ngan pagkaluoy, bag-o hira kada aga; dako gud an imo kamatinumanon.

Salmo 103:17

Kundi gugma han Ginuo padayon man Han natahod ha iya, may kahadlokan; Ngan nagpapadayon iya kaupayan Ngadto han ngatanan gud nga katulinan.

Tito 3:5

Gintalwas kita niya. Diri adto tungod hin ano man nga magupay nga mga buhat nga aton ginbuhat, kundi tungod han iya

kalugaringon nga pagkaluoy nga gintalwas kita niya pinaagi han paghugas han Espiritu Santo nga nahatag ha aton hin bag-o nga pagkatawo ngan bag-o nga kinabuhi.

Salmo 108:4

Nalapos han kalangitan an iya dayuday nga paghigugma, tubtob ha mga panganuron an imo kamatinumanon.

Salmo 103:11

Sugad, kahitaas hadton kalangitan Ha igbaw han tuma hinin kalibutan, Amo gud kadako an iya gugma man Para hadton ha iya may kahadlokan.

NAGTAWAG HA ATON AN DYOS HIN 13

PAGDAOP HA IYA

Isaias 1:18

Nasiring an Ginuo, "Hala, pagtuhay daw kita. Namantsahan kamo hin pula tungod hin sala, kundi huhugasan ko kamo sugad hin yelo kalimpyo. Mapula hin duro an iyo mga mantsa, kundi magmamabusag kamo pareho hin gapas.

Padayag 22:17

Nagsiring an Espiritu ngan an Karason nga Babaye, "Kadi!" Kinahanglan sumiring liwat an ngatanan nga nabati hini, "Kadi!" Pakadi, an bisan hin-o nga inuuhaw; karawta, sugad nga

hatag, an tubig nga nahatag han kinabubi, an bisan hin-o nga naruruyag hito.

Mateo 11:28

"Kadi kamo ha akon, ngatanan kamo nga binubutlaw pagdinara han iyo mabug-at nga mga darad-on, ngan papapahuwayon ko kamo.

Juan 7:37

An kataposan nga adlaw han pyesta amo an gidadakoi nga adlaw. Hito nga adlaw tinmindog hi Jesus ngan nagsiring hin dako nga tingog, "Kinahanglan kumadi ha akon ngan uminom an bisan hin-o nga inuuhaw.

14 DIRI NGATANAN NGA TAWO ANAK HAN DYOS

Juan 1:12

**Kundi tinagan niya hin katu-
ngod nga magin anak han Dyos
adton pira nga kinmarawat ngan
tinmuo ha iya.**

Mga Taga Filipos 2:15

**Basi mainusente ngan maputli
unta kamo, sugad nga hingpit
nga mga anak han Dyos, nga
nag-uukoy ha kalibutan hin ma-
graot ngan makasasala nga ka-
tawhan. Kinahanglan sumiga ka-
mo ha butnga nira sugad hin
mga bituon nga naglalamrag han
kalangitan.**

2 Mga Taga Corinto 6:17, 18
Sanglit nasiring an Ginuo:

**“Kinahanglan bumaya kamo ha
ira, ngan lumain kamo ha ira.
Ayaw kamo panginlabot han
maghugaw, ngan kakarawaton
ko kamo. Magigin Amay ako
niyo, ngan magigin akon kamo
mga anak nga kalalaken-an ngan
kababayen-an, nasiring an Ginuo
nga Makagarahom han Ngata-
nan.”**

1 Juan 3:10

**Amo ini an klaro nga kalainan
han mga anak han Dyos ngan
han mga anak han Yawa: diri
anak han Dyos an bisan hin-o
nga diri nagbubuhat hin mata-
dong ngan diri nahigugma han
iya bugto.**

ANO AN SIRING HAN DYOS HIUNONG HAN 15 MAKAHURUBOG NGA IRIMNON

Isaias 5:11

Kamakaharadlok para ha iyo nga nabangon ha maagahon pa basi magtikang na pag-ininom, ngan haros mag-aga an iyo paghinubog.

Mga Taga Galacia 5:19-21

Dayag kaupay an binubuhat han tawhanon nga kinaiya: Nagpapakita ito ha malaw-ay, mahugaw, ngan mangil-ad nga mga panggawi: ha pagsingba hin mga diyosdiyos, pagdiwata, pagdinumtanay, pag-aruaraway, pag-inabughoay, pagkasina, pagkahakog, pagkabulagbulag; pagkaawaanon, pagkaparahubog, may mangil-ad

nga mga pagkalipay, ngan iba pa nga mga bagay nga sugad hini. Ginpapahimangno ko kamo yana, sugad han ginbuhat ko hadto: diri masasakop han Ginhadian han Dyos adton nagbubuhat hini nga mga butang.

Mga Taga Roma 13:13, 14

Manggawi na kita hin maupay, sugad nga mga tawo nga nagkikinabuhi ha kahayag han adlaw, waray na malaw-ay nga mga pagkalipay, o paghubog-hubog, waray na kalaw-ayan o kahugawan, waray na pag-inaragway o pag-inabugho-ay. Kundi dad-on niyo an mga hinangiban

han Ginuo Jesu-Cristo, ngan diri na niyo pagtagdon an iyo maka-

sal-anon nga kinaiya, pagtuman han mga ungara hito.

16 DIRI IGO AN KASINSIRO

Marcos 10:17b-21

. . . “Maupay nga Magturutdo, ano an kinahanglan ko buhaton basi kumarawat ako han kinabuhi nga dayon?” Nagpakiana hi Jesus. . . “Maaram ka han kasugoanan: ‘Diri ka magpatay; diri ka manlibog; diri ka magbuwa; diri ka maglimbong; tumahod ka han amay ug iroy nimo.’” Binmaton an tawo, “Magturutdo, gintuman ko ini ngatanan nga kasugoanan tikang pa han akon kabata.” Tinutokan hiya ni Jesus hin mahigugmaon, ngan ginsiring, “Usa nala nga butang an kinahanglan

mo. Kadto na, ibaligya an ngatanan nga imo manggad, ngan ihatag an kwarta ha mga pobre, ngan magkakaada ka manggad ha langit. Katapos, balik ngan sunod ha akon.”

Mateo 22:37, 38

Binmaton hi Jesus, “‘Kinahanglan higugmaon mo an Ginuo nga imo Dyos ha bug-os mo nga kasingkasing, ha bug-os mo nga kalag, ngan ha bug-os mo nga hunahuna.’ Amo ini an gidadakoi ngan gimapupulsani nga kasugoan.”

Santiago 1:22

Ayaw paglimbongi an iyo kalugaringon pinaagi hin pamati la han iya pulong, kundi buhata niyo ito.

Mga Taga Efeso 5:6

Ayaw kamo pagpalimbong bisan kan kanay pinaagi hin tinuyaw nga mga pulong; tungod hini nga mga butang maabot an kapungot han Dyos ha mga diri nagsusugot ha iya.

1 Mga Taga Corinto 6:9, 10

Maaram na gud kamo nga diri makakaangkon han Ginhadian han Dyos an mga magraot. Ayaw paglimbongi an iyo kaluga-

ringon; diri manta makakaangkon han Ginhadian han Dyos an mga maglaw-ay, o mga masingbahon hin mga diyosdiyos, o mga parapanlibog, o mga maipahon ha igkasi lalake o igkasi babaye, o mga tikasan, o mga halot, o mga parahubog, o mga magyubit, o mga kawatan.

1 Juan 3:7, 8b

Ayaw kamo pagpalimbong, mga anak ko! Matadong an bisan hin-o nga nagbubuhat hin matadong, sugad nga matadong man hi Cristo. Sakop han Yawa an bisan hin-o nga nagpapadayon pagpinakasala, kay nakasala an Yawa tikang pa ha tinikangan.

18 NABUNGA HIN KAMATAYON AN SALA

Kon ginagamhan han tawhanon nga kinaiya an iyo hunahuna, nabunga ito hin kamatayon; kundi kon ginagamhan han Espiritu an iyo mga hunahuna, nabunga ito hin kinabuhi ngan kalinaw. — Mga Taga Roma 8:6

Mga Taga Roma 5:12

Sinmulod ha kalibutan an sala pinaagi hin usa ka tawo, ngan nagdara hin kamatayon an iya sala. Tungod hito, nagsarang an kamatayon ha ngatanan nga kawatuhan, kay nakasala man an ngatanan nga mga tawo.

Ezequiel 18:20

An nakakasala amo man an mamamatay. Diri mag-aantos in

anak tungod han mga sala han iya amay, o an amay tungod han mga sala han iya anak. Babalason an maupay nga tawo han pagbuhat niya hin maupay, ngan an maraot nga tawo han maraot nga iya binubuhat.

Darahonon 11:19

(Mga Proverbio)

Mabubuhi an nasisindak pagbuhat hin katadongan, kundi mapatay an padayon nga nagbuhat hin kasaypanan.

Santiago 1:15

Niyan natubo an iya maraot nga ungara ngan nabunga hin sala; ngan kon hinog na an sala, nabunga ito hin kamatayon.

GINDAOG NI CRISTO AN KAMATAYON 19

1 Mga Taga Corinto 15:3, 4

Iginhatag ko na ha iyo an akon nakarawat, nga amo an labi kamapulsanon: nga namatay hi Cristo tungod han aton mga sala, sumala han iginsurat ha Kasuratan; nga iginlubong hiya ngan ginbanhaw ha ikatulo ka adlaw, sumala han iginsurat ha Kasuratan.

Juan 10:17, 18

“Nahiguguma an Amay ha akon kay andam man ako paghatag han akon kinabuhi basi mahibalik liwat ini ha akon. Waray makakaagaw han akon

kinabuhi; ihinahatag ko ini ha akon kalugaringon nga pagbuot. May-ada ko gahom pagtubyan han akon kinabuhi ngan may-ada ko liwat gahom pagbawi hini. Amo ini an ipinapagbuhat ha akon han akon Amay.”

Lucas 7:14, 15a

Hinmarani hiya ngan ginkamkam an lungon, ngan inmukoy an mga tawo nga nagpapasag hito. Sinmiring hi Jesus, “Batanon! Nasiring ako ha imo, buhat!” Linmingkod an minatay ngan nagtikang pagyakan.

Deuteronomio 5:7-21

“‘Ayaw pagsingba hin iba nga diyos labot ha akon.

“‘Ayaw paghimo para ha imo hin mga kapareho hin bisan ano nga aadto ha langit, o aanhi ha tuna, o han aadto ha tubig ha ilarom han tuna. Ayaw pagyukbo ha bisan ano nga ladawan o pagsingba hito. . .

“‘Ayaw paggamita an akon ngaran para hin magraot nga katuyoanan, kay makastigo ako nga Ginuo nga iyo Dyos kan bisan hin-o nga nagamit han akon ngaran hin diri amo nga paggamit.

“‘Tumana an Sabado ngan baraana ito, sugad han iginsugo ha iyo nakon nga Ginuo nga iyo Dyos. May niyo unom ka adlaw pagbuhat han iyo buruhaton, kundi an ikapito amo an adlaw hin pagpahuway nga iginhalad ha akon. Dida hito nga adlaw kinahanglan waray magtrabaho. . .

“‘Tahora an imo amay ngan an imo iroy, sugad han iginsugo ha iyo nakon nga Ginuo nga iyo Dyos, ngan mag-uukoy kamo hin maiha ha tuna nga akon ihinabatag ha iyo.

“‘Ayaw pagpatay hin tawo.

“Ayaw panlibog.

“Ayaw pangawat.

**“Ayaw pagsumbong hin buwa
kontra kan bisan hin-o.**

**“Ayaw pag-iarangkona an
asawa hin iba, o an iya balay,
o an iya tuna, o an iya mga uri-
pon, o an iya kabakahan, o an
iya kaasnohan, o an bisan ano
nga iya gintatag-iya.’”**

DIRI KA MAKAKATAGO TIKANG HA DYOS 21

Lucas 8:17

**Dadad-on manta ha kadaygan
an bisan ano-nga tinago, ngan
hibabaroan ngan mahahayagan
an bisan ano nga tinahoban.**

Salmo 139:8 ug 12

**Kon kumadto ako ha langit,
aadto ka; kon pumahuway ako
ha lubnganan, aadto ka. Kundi
diri masirom ha imo bisan pa**

**an kasisidman, ngan sugad gudla
han adlaw kalamrag an gab-i.
Pareho la ha imo an kasisidman
ngan an kapawa.**

Jeremias 23:24

**Waray makakatago nga diri
ko hiya hikikit-an. Diri ka ba
maaram nga aada ako ha nga-
tanan nga dapit ha langit ngan
ha tuna?**

22 WARAY KATAPOSAN AN SIROT HAN MGA DIRI DYOSNON

Mateo 18:8

“Kon magigin hinungdan an imo kamot o imo tiil han imo paghimulag ha akon, utda ito ngan ilabog! Gabay ka sumulod ha kinabuhi nga pungkol an imo kamot o tiil kontra hin may-ada mo duha nga kamot ngan duha nga tiil kundi ilalabog ka manla ha dayon nga kalayo.”

2 Pedro 3:7

Kundi igin-aandam an mga langit ngan an tuna nga aada yana, pinaagi han amo gihapon nga pulong han Dyos, basi bung-

kagon pinaagi hin kalayo. Gindaandam hira para han adlaw nga paghuhukman ngan paglalag-lagon an mga tawo nga diri dyosnon.

Mateo 13:41, 42

“Magsusugo an Anak han Tawo han iya mga anghel, ngan titirokon nira tikang han iya Ginhadian an ngatanan nga nakapasala han mga tawo ngan an ngatanan nga mga magburuhat hin maraot, ngan ilalabog hira ha naglalaga nga hudno. Mananangis hira didto ngan mangingigot an ira mga ngipon.”

1 Juan 4:17

Ginhingpit an gugma dinhi ha aton, basi diri kita mahadlok ha Adlaw han Paghukom; kay pareho man han kan Cristo an aton kinabuhi dinhi hini nga kalibutan.

2 Mga Taga Corinto 5:10

Kay kinahanglan umatubang kita ngatanan kan Cristo, basi paghukman niya. Makarawat an taga han angay ha iya, sumala han maupay o maraot nga iya nabuhat dinhi ha kalibutan.

2 Pedro 2:9

Sanglit maaram an Ginuo bumawi han mga dyosnon tikang

han ira mga pagsulay, ngan maaram kumastigo han mga diri dyosnon para han Adlaw han Paghukom.

Mga Buhat 17:31

“Kay nagtalaan hiya hin adlaw nga paghuhukman niya hin matadong an kalibutan, pinaagi hin tawo nga iya ginpili. Ginpamatud-an niya ini ha ngatanan, pinaagi han pagbanhawa niya hito nga tawo!”

Mga Hebreohanon 9:27

Kinahanglan mamatay an tagasatagsa makausa, ngan katapos hito paghukman hiya han Dyos.

Mga Taga Roma 9:16

Sanglit diri ito ipinapasikad han kinaruruyag o binubuhat han tawo, kundi han kaluoy la han Dyos.

2 Mga Taga Corinto 8:9

Kay sayod man kamo han mahinatagon nga gugma han aton Ginuo Jesu-Cristo, nga bisan kon manggaranon hiya, nagpakapobre han iya kalugaringon tungod ha iyo, basi mariko kamo pinaagi han iya kapobre.

Mga Taga Roma 5:15

Kundi diri magpareho hira nga duha; kay diri pareho han sala

ni Adan an libre nga hatag han Dyos. Matuod ito nga damo an nagkamatay tungod han sala hadto nga usa ka tawo. Kundi labaw pa gud ka dako an mahigugmaon nga kaluoy han Dyos, ngan sugad man an iya libre nga hatag ngadto han kadam-an nga mga tawo pinaagi han mahigugmaon nga kaluoy han usa ka tawo, hi Jesu-Cristo.

Mga Buhat 4:33

Upod hin dako nga gahom, nagsaksi an mga apustoles han pagkabahaw han Ginuo nga Jesus, ngan ginpasidunggan gud hira ngatanan han Dyos.

2 Mga Taga Corinto 7:10

Kay nakakaliwat han kasing-kasing nga nagdadalan ngadto ha katalwasan an kabido nga ginagamit han Dyos, ngan diri angay pagbasolan ito! Kundi nakakamatay an kabido nga kalibutanon.

Mga Buhat 17:30

“Ginpasagdan la han Dyos an mga panahon han diri pa magaram an mga tawo, kundi yana, iginsusugo na niya nga bumaya han ira magraot nga mga paagi an ngatanan nga mga tawo ha ngatanan nga dapit.”

Mga Buhat 2:38

Niyan nagbaton ha ira hi Pedro, “Baya-i an iyo mga sala, ngan magpabunyag an tagsatagsa ha iyo ha ngaran ni Jesu-Cristo, basi pasayloon an iyo mga sala, ngan kakarawaton niyo an Espiritu Santo nga hatag han Dyos.”

Mga Buhat 3:19

“Sanglit, pagbasol kamo ngan balik ha Dyos, basi paraon niya an iyo nga sala; basi umabot ha iyo adto nga mga panahon han espirituhanon nga kusog tikang ha prisensya han Ginuo.”

26 AN PAGPASAYLO HAN MGA SALA

Isaias 55:7

Pabayai han magraot an ira paagi hin pagkinabuhi, ngan paliwani an ira paagi hin panhuna-huna.

Marcos 2:5

Nakasabot hi Jesus han ira dako nga pagtuo, ngan ginsiring niya an lulid, "Anak, ginpasaylo na an imo mga sala."

Ezequiel 18:21

Kon umundang pagpakasala in maraot nga tawo ngan magtuman hiya han akon mga ba-

laod, kon magbuhat hiya han matadong ug maupay, diri hiya mamamatay, mabubuhi gud hiya.

Padayag 3:20

"Pamatii! Natindog ako ha purta ngan nagtutuktok; kon bin-o an nabati han akon tingog ngan naabre han purta, masulod ako ha iya balay ngan masaro ako ha iya ngan masaro hiya ha akon.'"

Mateo 6:14

"Kon pasayloon niyo an nakakasala ha iyo, pasasayloon man kamo han Amay niyo ha langit."

AN PAGHIBULAG HAN PAGKAKALIBUTANON 27

Mga Taga Efeso 5:11

Ayaw kamo api pagbuhat han waray pulos nga mga butang, nga binubuhat han mga tawo nga kanan kasisidman. Lugod, dad-a hira ha kapaw-an.

1 Juan 2:15, 16

Ayaw niyo higugmaa an kalibutan o bisan ano nga kanan kalibutan. Kon hinihigugma niyo an kalibutan, waray ha iyo an gugma para han Amay. An ngatanan nga kanan kalibutan — an inuungara han makasasala nga unod, an kinikita ngan kinaruruyag han katawhan, ngan an ngatanan dinhi ha kalibutan

nga ipinaparayaw han katawhan — waray hini natikang ha Amay; kundi natikang la ha kalibutan ito ngatanan.

Tito 2:11, 12

Kay iginpahayag han Dyos an iya mahigugmaon nga kaluoy para han katalwasan han ngatanan nga mga tawo. Nagtututdo ha aton ito nga kaluoy, nga bayaan ta an diri dyosnon nga pagkinabuhi ngan an kalibutanon nga mga kairiphon, ngan magkinabuhi hin may pagpugong han kalugaringon, hin matadong, ngan hin dyosnon nga kinabuhidinhini nga kalibutan.

1 Juan 5:18

Maaram kita nga waray anak han Dyos nga nagpapadayon hin pagpinakasala, kay pinananalipdan hiya han Anak han Dyos, sanglit diri makakadaot ha iya an Yawa.

Juan 3:3

Nagbaton hi Jesus, "Susumatan ko ikaw hin tinuod: waray tawo nga makakakita han Ginhadian han Dyos, gawas kon matawo hiya hin utro."

1 Pedro 1:23

Kay natawo na kamo hin bag-o pinaagi han buhi ngan dayon nga pulong han Dyos. Mga anak na kamo diri hin ginikanan nga

mamaratyon, kundi hin ginikanan nga diri mamaratyon.

Ezequiel 36:26b

Tatagan ko kamo hin bag-o nga kasingkasing ngan bag-o nga hunahuna.

1 Juan 2:29

Maaram kamo nga matadong hi Cristo, sanglit angay hibaroan niyo nga anak han Dyos an bisan hin-o nga nagbubuhat hin matadong.

2 Mga Taga Corinto 5:17

Kon nakikigkausa na kan Cristo in bisan hin-o nga tawo, bag-o na hiya nga binuhat, waray na an daan, inmabot na an bag-o.

PATAY HA SALA — NABANHAW KAN CRISTO 29

Mga Taga Roma 6:2 ug 11

Namatay na kita ha sala, uunahon pa naton pagpadayon hin pagkinabuhi dida hito? . . . Ha amo man nga paagi, kinahanglan isipon niyo nga patay na kamo ha sala, kundi buhi ngadto ha Dyos, ha pakigkausa kan Cristo Jesus.

Mga Taga Colosas 3:1

Ginbanhaw na kamo upod kan Cristo, sanglit pangitaa niyo an mga butang nga aadto ha langit, diin nalingkod hi Cristo dida han iya truno, ha tuo han Dyos.

1 Pedro 2:24

Gindara ni Cristo ngahaw ha iya lawas ngadto ha krus an aton mga sala, basi mamatay unta kita ha sala ngan mabuhi pagtuman han kaburut-on han Dyos. Nagkatatambal kamo tungod han iya mga kasamdan.

Mga Taga Efeso 2:1 ug 6

Hadto anay mga patay kamo ha espiritu tungod han iyo mga pagtalapas ngan mga sala. . . . Ha aton pakigkausa kan Cristo Jesus, ginbanhaw kita upod ha iya, basi maghadi kita kaupod niya didto ha langit.

“Ngan amo ini an dayon nga kinabuhi: nga kumilala ha imo an mga tawo, nga ikaw la an matuod nga Dyos, ngan kumilala kan Jesu-Cristo nga imo ginsugo.”
— Juan 17:3

Mga Taga Roma 6:23

Kay kamatayon an suhol han sala; kundi dayon nga kinabuhi ha pakigkausa kan Cristo Jesus nga aton Ginuo an libre nga hatag han Dyos.

Juan 3:14, 15 ug 36

“Sugad nga gin-isa ni Moises didto ha kamingawan an halas nga brunse, kinahanglan man liwat nga isahon an Anak han Tawo hin sugad nga paagi, basi

makaangkon han dayon nga kinabuhi an ngatanan nga natuo ha iya.” . . . May dayon nga kinabuhi an nasarig han Anak; kundi an nalaris han Anak diri gud makakaangkon han kinabuhi, ngan magpapabilin ha iya hin kadayonan an kapungot han Dyos.

Juan 5:24

“Susumatan ko kamo hin tinuod: May-ada na dayon nga kinabuhi an bisan hin-o nga namamati han akon mga pulong, ngan natuo ha iya nga nagsugo ha akon. Diri na hiya naiilarom han sirot, kay inmagi na hiya han kamatayon ngadto ha kinabuhi.”

1 Juan 4:13

Amo ini an pakasiguro ta nga nag-uukoy kita dida ha Dyos ngan nag-uukoy man hiya dida ha aton: iginhatag niya ha aton an iya Espiritu.

Juan 14:21

“Nahigugma ha akon an bisan hin-o nga nakarawat ngan nagtutuman han akon mga kasugoan. Hihigugmaon han akon Amay adton nahigugma ha akon; hihi-gugmaon ko man hiya ngan magpapadayag ako ngada ha iya.”

1 Juan 3:18, 19

Mga anak ko, kinahanglan diri mga pulong ngan mga yakân la an aton paghigugma; kinahang-

lan tinuod ito nga gugma nga iginpapakita hin mga buhat. Sanglit amo ini an paghibaro naton nga sakop kita han kama-tuoran ngan nga makakatapod an aton kasingkasing ha atubangan han Dyos.

Mga Taga Galacia 4:6

Pagpakita nga mga anak kamo niya, ginpakanhi han Dyos ha aton mga kasingkasing an Espiritu han iya Anak, an Espiritu nga natawag, “Amay, akon Amay.”

Mga Taga Roma 8:16

Naduyog ha aton espiritu an Espiritu han Dyos, pagpamatuod nga mga anak kita han Dyos.

NAHATAG HIN KALIPAY AN PAG-UKOY HA ATON NI CRISTO

“Iginsumat ko ini ha iyo basi mahingada ha iyo an akon kalipay, ngan basi mahingpit an iyo kalipay.”
— Juan 15:11

Juan 17:13

“Kundi yana makada na ako ha imo, ngan ginhibimangraw ko ini nga mga butang dinhi ha kalibutan, basi mahura gud hira han akon kalipay.”

Mga Taga Galacia 2:20

Ginpatay ako upod kan Cristo ha iya krus, sanglit diri na ako an nagkikinabuhi, kundi hi Cristo nga nag-uukoy didi ha akon. Ini nga kinabuhi nga akon ginkikinabuhi yana, ginkikinabuhi ko

pinaagi hin pagsarig han Anak han Dyos, nga naghigugma ha akon, ngan naghatag han iya kinabuhi tungod ha akon.

Mga Taga Roma 14:17

Kay diri hiunong hin pagkaon ngan pag-inom an Ginhadian han Dyos, kundi hiunong hin pagkamatadong, kalinaw, ngan kalipay, nga ihinahatag han Espiritu Santo.

Salmo 16:11

Ipakikita mo ha akon an agianan tipakadto ha kinabuhi; naliipay gud ako han imo pakigkaupod, ngan nagdadara hin dayon nga kalipay an imo tambulig.

Mga Taga Roma 2:13

Kay diri an pamati han Balaod an nakakahimo han tawo nga matadong ha Dyos, kundi an pagtuman han iginsusugo han Balaod.

2 Mga Taga Tesalonica 1:7-9

Ngan papapahuwayon kamo nga nag-aantos, ngan sugad man kami. Bubuhaton niya ini kon umabot na an Ginuo nga Jesus tikang ha langit, inupdan han iya gamhanan nga mga anghel, upod in nagdidilaab nga kalayo, pag-sirot hadton diri nakilala han Dyos, ngan hadton diri nagtu-

tuman han Maupay nga Sumat mahitungod han aton Ginuo nga Jesus. Mag-aantos hira han sirot han dayon nga pagkalaglag nga bulag han Ginuo ngan han iya langitnon nga gugma.

Mga Taga Roma 6:16

Sayod na kamo nga kon itinutubyan niyo an iyo kalugaringon sugad hin mga uripon, nauuripon kamo han agaron nga iyo ginsusugot — magin han sala, nga nabunga hin kamatayon, o han pagkamasinugtanon, nga nabunga hin pagkainisip nga matadong ha Dyos.

34 KINAHANGLAN ITUG-AN HI CRISTO

Mga Taga Filipos 2:11

Ngan magsasangyaw an ngatanan nga amo hi Jesu-Cristo an Ginuo, ha kadungganan han Dyos nga Amay.

Lucas 9:26

“Kon may-ada maawod ha akon ngan han akon pagturon-an, niyan, ikakaawod man hiya han Anak han Tawo kon kumanhi na hiya ha iya kagamhanan ngan han kagamhanan han Amay niya ngan han iya baraan nga mga anghel.”

Mga Taga Roma 10:9, 10

Matatalwas ka, kon itug-an mo ha imo mga im-im nga, “Gi-

nuo hi Jesus,” ngan tumuo ka ha imo kasingkasing, nga ginbahaw hiya han Dyos. Kay natuo kita ha aton kasingkasing, ngan gin-isip kita nga matadong ha Dyos; nagtutug-an kita pinaagi han aton mga im-im, ngan natalwas kita.

Mateo 10:32, 33

“Bisan hin-o in magtug-an ha atubangan han mga tawo nga akon hiya, igtutug-an ko man hiya ha atubangan han akon Amay ha langit. Kundi an diri magpadayag nga akon hiya, iglilirong ko man hiya ha atubangan han akon Amay ha langit.”

HI SATANAS — AN ATON GIDADAKOI NGA KAAWAY 35

1 Pedro 5:8

Pag-ikmat ngan pagtagam kamo! Naglilibutlibot an Yawa nga iyo kaaway, sugad hin nagngungurob nga liyon nga nangingita hin iya makakaon.

Mga Taga Efeso 6:11

Isul-ot niyo an bug-os nga hinganiban nga ihinahatag han Dyos ha iyo, basi makaato kamo kontra han yawan-on nga mga limbong han Yawa.

Mateo 4:1 ug 10, 11

Niyan ginmandoan hi Jesus han Espiritu ngadto ha kamingawan basi pagsulayon han Yawa. . . . Binmaton hi Jesus, "Iwas

dida, Satanas! Kay nasiring an Kasuratan, 'Singbahon mo an Ginuo nga imo Dyos, ngan hiya la an pagsirbehan mo!'" Ngan binmaya ha iya an Yawa, ngan nagkaabot in mga anghel ngan nagtimangno kan Jesus.

Mga Buhat 26:18

"'Bubuksan mo an ira mga mata, ngan pababalikon hira tikang han kasisidman ngadto han kalamrag, ngan tikang han gahom ni Satanas nagdto han Dyos, basi nga pinaagi han pagtuo nira ha akon, pasayloon hira han ira mga sala, ngan kumarawat hira han ira bahin dida han mga pinili nga katawhan han Dyos!'"

1 Juan 3:8

Sakop han Yawa an bisan hin-o nga nagpapadayon pagpinakasala, kay nakasala an Yawa tikang pa ha tinikangan. Kinmanhi an Anak han Dyos tungod gud hini nga hinungdan: pagbungkag han mga buhat han Yawa.

Mga Taga Roma 8.35 ug 37

Niyan, hin-o man in makakapabulag ha aton tikang han gugma ni Cristo? Makakahimo ba an kasakitan, o an kakurian, o an pagtimaraot, o an kagutom, o an kakablasan, o an kataragman, o an kamatayon? . . . Diri, ha butnga hini ngatanan, may-

ada kita hingpit nga pagdaragan, pinaagi ha iya nga naghigugma ha aton!

Santiago 4:7, 8a

Sanglit, pagpasakop kamo han Dyos. Atohi niyo an Yawa ngan mapahirayo hiya ha iyo. Pahirani kamo han Dyos, ngan mapahirani hiya ha iyo.

2 Mga Taga-Tesalonica 2:8

Niyan mapakita an Yawan-on, ngan papatayon hiya han Ginuo nga Jesus pinaagi han gininhawa tikang han iya baba, ngan lalag-lagon hiya pinaagi han iya gamhanan nga pagpadayag, kon umabot na hiya.

GUGMA, AN PROYBA HAN PAGKATINUN-AN 37

Mga Taga-Galacia 5:22, 23a
Kundi nabunga an Espiritu hin gugma, kalipay, kamurayaw, pag-pailob, pagkaluoy, pagkamaupay, pagkamatimumanon, pagpaubos, ngan pagpugong han kalugaringon.

Juan 21:16

Nagsiring hi Jesus ha iya hin ika duha, "Simon, anak ni Juan, nahigugma ka ba ha akon?" Binmaton hiya, "Uo, Ginuo, sayod ka nga nahigugma ako ha imo." Nagsiring ha iya hi Jesus, "Mangnoi an akon mga karnero."

1 Juan 3:14

Maaram kita nga binayaan ta na an kamatayon ngan aada na

kita ha kinabuhi. Maaram kita hito kay nahigugma kita han aton kabugtoan. Aada pa ha kamatayon an bisan hin-o nga diri nahigugma.

Juan 13:35

"Kon maggihigugmaay kamo, mahibabaro an ngatanan nga akon kamo mga tinun-an."

1 Juan 4:20

Kon may sumiring, "Nahigugma ako han Dyos." kundi nagdudumot han iya bugto, buwaon hiya. Kay diri hiya makakahigugma han Dyos nga waray niya hikit-i, kon diri niya hinihigugma an iya bugto nga kinikita niya.

Mga Taga-Roma 4:25

Igintubyan hiya nga mamatay tungod han aton mga sala, ngan ginbanhaw hiya basi isipon kita nga matadong ha Dyos.

Juan 20:26-28

Paglabay hin usa ka simana, nagkaurusa na liwat an mga tinun-an ha sulod hin balay, ngan upod na nira hi Tomas. Trangkado an mga purta, kundi inmabot hi Jesus ngan tinmindog ha butnga nira ngan nagsiring, "Mag-upod ha iyo an kamuryaw." Ngan nagsiring hiya kan Tomas, "Ibutang didi an imo tudlo, ngan kitaa an akon mga kamot; ngan unata an imo kamot

ngan kamkama an akon kagiliran. Ayaw na pagruhaduha, tuona!" Binmaton hi Tomas ha iya, "Ginuo ko, ngan Dyos ko!"

Mga Buhat 10:39-41

"Mga saksi kami han ngatanan nga ginbuhat niya ha tunahan mga Judiyo ngan ha Jerusalem. Ginpatay hiya nira pinaagi hin pagraysangan ha iya ha krus. Kundi ginbanhaw hiya han Dyos ha ikatulo ka adlaw, ngan iginpakita hiya, diri ha ngatanan nga katawhan kundi ha amon la nga mga saksi, nga ginpili na ngadaan han Dyos. Kinmaon ngan inminom kami upod ha iya kahuman niya mabanhaw."

AN PAGKABANHAW, AN ATON BUHI NGA PAGLAOM 39

Mateo 16:21

Tikang hadto ginsiring ni Jesus an iya mga tinun-an: “Kinahanglan kumadto ako ha Jerusalem ngan mag-antos hin damo nga mga kakurian tikang ha kamot han mga katigurangan, labaw nga kapadian, ngan mga magtuturdo han Balaod. Papatayon ako, kundi mababanhaw liwat ha ikatulo ka adlaw.”

Juan 5:25 ug 28, 29

“Susumatan ko kamo hin tinuod: Tiarabot an panahon, ngan inmabot na ini — nga makakabati an mga patay han tingog han Anak han Dyos, ngan mabubuhi

an makabati. . . Ayaw kamo hi-pausa hini; tiarabot an panahon nga makakabati han iya tingog an ngatanan nga mga minatay ha lubnganan, ngan magkakaguwa hira han ira mga lubnganan; mabangon ngan mabubuhi adton nagbuhat hin mag-upay, ngan mabangon ngan pagsisirotan adton nagbuhat hin magraot.”

2 Mga Taga-Corinto 4:14

Maaram kami nga an Dyos nga nagbanhaw han Ginuo nga Jesus, magbabanhaw man liwat ha amon upod kan Jesus, ngan magdadara ha amon upod ha iyo ngadto ha atubangan han Dyos.

Mga Hebreohanon 12:14

Tinguhaa pakigmurayaw han ngatanan nga mga tawo, ngan pag-ukoy hin baraan nga kina-bubi, kay gawas hito waray makakakita han Ginuo.

1 Pedro 1:2 ug 15

Ginpili kamo sumala han tuyo han Dyos nga Amay, ngan ginbaraan nga katawhan pinaagi han iya dugo. Maangkon unta niyo hin kahuraan an mahigugmaon nga kaluoy ngan kamurayaw. . . Lugod, kinahanglan mabaraan kamo ha ngatanan nga iyo binubuhat, sugad gud nga baraan an Dyos nga nagtawag ha iyo.

Lucas 1:74, 75

“Ngan nagsaad nga tatalwason kita niya tikang han aton mga kaaway, ngan tutugotan kita pagalagad ha iya hin waray kahadlok; pagbaraan ngan pagmata-dong ha iya atubangan, ha ngatanan nga mga adlaw han aton kinabuhi.”

2 Timoteo 2:21

Kon may-ada maglinis han iya kalugaringon tikang hini ngatanan nga karat-an, gagamiton hiya para hin linain nga mga katuyoanan, kay iginhalad ngan mapulsanon hiya ha iya Agaron, andam paggamita para hin tagsa nga maupay nga buhat.

Isaias 35:8

Magkakaada didto hiluag nga dalan, nga tatawgon “An Dalan hin Pagkabaraan.” Waray gud makasasala nga maagi hini nga dalan; waray mga lurong nga magwawara hadton mga naglakat didto.

Mateo 3:11

“Nagbubunyag ako ha iyo hin tubig, tigaman han iyo pagbasol; kundi magbubunyag ha iyo han Espiritu Santo ngan hin kalayo hiya nga masunod ha akon. Labaw gud hiya ha akon; diri ngani ako takos pagbitbit han iya mga sapatos.”

1 Juan 1:9

Kundi kon igkumpisal ta an aton mga sala ngadto ha Dyos, pagtutumanon niya an iya saad ngan pagbubuhaton an mata-dong: pasasayloon kita niya han aton mga sala ngan lilinisan kita niya tikang han ngatanan nga karat-an.

Mga Hebreohanon 13:12

Tungod hini nga hinungdan, namatay man hi Jesus ha gawas han purtahan han syudad, basi maglinis han katawhan tikang han sala pinaagi han iya kalugaringon nga dugo.

AN TAWO NGA PUNO HAN ESPIRITU

Mga Buhat 1:8a

“Kundi mapupuno kamo hin gahom kon kumusad na ha iyo an Espiritu Santo, ngan magigin saksi ko kamo.

Mga Buhat 4:31

Kahuman nira mag-ampo, nabay-og an dapit nga ira ginkakatirokan. Napuno hira ngatanan han Espiritu Santo ngan nagtikang pagwali han minsahé han Dyos hin madasigon.

Mga Taga-Roma 8:9

Kundi diri na kamo nagkikinabuhi sumala han igintututdo han iyo tawhanon nga kinaiya, kundi sumala han igintututdo han Espi-

ritu—kon ha tinuod nag-uukoy ha iyo an Espiritu han Dyos. Diri sakop ni Cristo an bisan hin-o nga waray han Espiritu ni Cristo.

Ezequiel 36:27

Ikakada ko ha sakob niyo an akon Espiritu ngan ipapatuman ko ha iyo an akon mga balaod ngan ipapasugot an ngatanan nga mga sugo nga akon iginhatag ha iyo.

Mga Buhat 11:24

Maupay nga tawo hi Bernabe, puno han Espiritu Santo ngan pagtuo. Ngan nakabig ha Ginuo in damo nga mga tawo.

Mga Buhat 13:52
Duro an kalipay han mga ti-

**nun-an ha Antioquia, ngan puno
hira han Espiritu Santo.**

AN URUSAHON NGA MGA SAAD HA MGA 43 CRISTOHANON

Padayag 21:4

**“Pagpapahiron niya an ngata-
nan nga mga luha tikang han
ira mga mata. Mawawaray na
kamatayon, waray na kabidoan,
pagtangis, o kasakit. Nawara na
an daan nga mga butang.”**

1 Pedro 4:12, 13

**Hinigugma ko nga kasangka-
yan, ayaw hipausa han mapait
nga pagsulay nga iyo gin-aantos,
nga daw nahinanabo ha iyo in**

**diri angay nga mga butang.
Lugod pagkalipay kamo nga na-
kakaangbit kamo han mga pag-
antos ni Cristo, basi magmali-
payon kamo kon ipadayag na an
iya kagamhanan.**

Isaias 66:2

**Ako ngahaw an nagtuha han
bug-os nga uniberso! Nalilipay
ako hadton mga mapinaubsanon
ngan mabinasolon, nga nahadlok
ngan nasugot ha akon.**

44 AN MGA SAAD HA MGA GINSUSULAY

Salmo 34:19

Nag-aantos hin damo nga kakurian an maupay nga tawo, kundi tinatalwas hiya han Ginuo hito ngatanan.

Mga Taga-Roma 8:28

Maaram kita nga ha ngatanan nga mga butang, nagbubuhat an Dyos para hin kaupayan ngadto hadton mga nahigugma ha iya, nga gintawag niya sumala han iya tuyo.

1 Mga Taga-Corinto 10:13

Amo ngahaw nga pagsulay nga naabot ha katawhan an ngatanan nga mga pagsulay nga in-

mabot ha iyo. Kundi nagtutuman gud an Dyos han iya saad, ngan diri hiya matugot nga pagsulayon kamo labaw han iyo gahom pag-ato; ha takna nga susulayon kamo, tatagan kamo niya hin kusog pag-ato hito, basi matalwas kamo.

Isaias 43:2

Kon umagi ka hin higlarom nga katubigan, uupdan ko ikaw; diri ka lalapwason han imo kakurian. Kon umagi ka hin kalayo, diri ka masusunog; diri maka-kaano ha imo an magkuri nga mga pagsulay.

Padayag 3:21

“Thabatag ko hadton mga nagdadaog an katungod paglingkod tupad ko ha akon trono, sugad nga nagmadaogon ako ngan yana nalingkod tupad han akon Amay ha iya trono.’”

Padayag 3:12

“Hihimoon ko nga harigi ha templo han akon Dyos an nagdadaog ngan diri nagud niya babayaan ito. Igsusurat ko dida ha iya an ngaran han syudad han akon Dyos, an bag-o nga Jerusalem nga makunsad tikang ha langit, tikang han akon Dyos. Igsusurat ko man liwat dida ha iya an akon bag-o nga ngaran.’”

Padayag 2:7

“Sanglit kon may-ada ka mga igdurungog, pamatii an isinisiring han Espiritu ngadto han mga singbahan! Ihahatag ko hadton mga nakadaog an katungod pagkaon han bunga han kahoy han kinabuhi nga naturok ha Tanaan han Dyos.’”

Padayag 3:5

“Magpapanapton hin busag pareho hini adton mga nagdadaog, ngan diri ko paparaon an ira mga ngaran tikang han basahon han mga buhi. Ipapahayag ko ha atubangan han akon Amay ngan han iya mga anghel nga akon hira mga sakop.’”

NAGHIMANGRAW HA ATON AN DYOS HIUNONG HAN PAGBULAG

“Kundi yana nasiring ako: Kon bulagan han lalake an iya asawa nga waray man unta maglalake, salaan hiya nga lalake han pakapanlibog han iya asawa, kon mag-asawa hin iba an babaye. Nakakapanlibog liwat an mangasawa han babaye nga binulagan.”

— Mateo 5:32

Mga Taga-Roma 7:2, 3

Sugad pananglit hin usa nga inasaw-an nga babaye, sumala han balaod, sakop hiya han iya bana, samtang buhi pa an bana; kundi kon patay na an bana, talwas na hiya tikang han balaod nga nagpasakop ha iya han

iya bana. Sanglit kon makigtampo hiya hin lain nga lalake, samtang buhi pa an iya bana, pagngangaranan hiya nga manlibog; kundi kon patay na an iya bana, talwas na hiya tikang han balaod, ngan diri na hiya nakakapanlibog, kon mangasawa hiya hin lain nga lalake.

1 Mga Taga-Corinto 7:11

Kinahanglan diri bumulag han iya bana an asawa; kon buhaton niya ito, kinahanglan magpabilin hiya nga waray bana, o kondiri, makighiuli hiya ha iya bana; ngan kinahanglan diri makigbulag han iya asawa an bana.

AN IKADUHA NGA PAG-ABOT NI CRISTO 47

Mateo 24:27

“Kay maabot an Anak han Tawo pareho hin kikiidlat nga naidlap ha bug-os nga langit, ti-kang ha sinirangan ngadto ha katundan.”

Padayag 3:11

“ ‘ Maabot na ako ha diri mai-ha. Bantayi hin maupay an aada ha imo, basi waray bisan hin-o nga makaagaw han imo primyo han pagdaog.’ ”

Marcos 8:38

“Sanglit ikaaawod man han Anak han Tawo an naaawod ha akon ngan han akon pagturon-an

dida hini nga makasasala nga kalibutan, kon kumanhi na hiya ha kagamhanan han Amay niya kaupod an iya baraan nga mga anghel.”

Santiago 5:8

Kinahanglan magmapinailobon man kamo liwat. Magmalinao-mon gud kamo kay hirani na an adlaw han pag-abot han Ginuo.

Juan 14:3

“Ngan katapas ko kadto ngan pag-andam hin lugar para ha iyo, mabalik ngan pauupdon ko kamo ha akon, basi kon hain ako aadto man liwat kamo.”

48 AN IKADUHA NGA PAG-ABOT NI CRISTO

Lucas 12:40

“Ngan pag-andam man liwat kamo, kay maabot an Anak han Tawo ha takna nga diri niyo ginpapamulat.”

1 Juan 3:2

Mga hihigugma ko, mga anak na kita yana han Dyos, kundi diri pa gud klaro kon ano an aton aabotan. Kundi maaram kita nga kon magpakita na hi Cristo, mapapareho kita ha iya, kay hikikit-an ta hiya sugad nga amo gud hiya.

Mga Buhat 1:11

Nagsiring hira, “Mga taga Galalea, kay-ano nga nagtiti-nukdaw kamo ngan nagkikinita

ngadto ha langit? Mabalik ini nga Jesus nga ginbabayaw ngadto ha langit tikang ha iyo, ha amo ngahaw nga paagi nga iyo hin-kit-an han pagsaka niya ngadto ha langit.”

Lucas 21:27

“Katapos, mapakita na an Anak han Tawo nga naabot dida hin dampog, upod in dako nga gahom ngan himaya.”

Padayag 16:15

“Pamatii! Maabot ako pareho hin kawatan! Palaran adton nag-aagma ngan nagmamangno han iya panapton, basi diri hiya maglakatlakat nga hubo ngan maalohan ha kadaygan!”

AN PULONG HAN DYOS

Salmo 119:89

Magpapadayon an imo pulong,
O Ginuo; marig-on ito ha langit.

Salmo 119:105

Lampara nga nagmamando
ha akon an imo pulong, ngan
kapawa han akon agianan.

2 Pedro 1:21

Kay waray panagna nga inma-
bot ha kaburut-on la hin tawo,
kundi gingamhan han Espiritu
Santo an mga tawo han paghi-
mangraw nira han minsabe nga
tikang ha Dyos.

2 Timoteo 3:16

Dinasig han Dyos an bug-os
nga Kasuratan, ngan mapulsanon
ito pagtutdo han kamatuoran,

pagsaway han kasaypanan, pag-
tadong han baliko nga mga bu-
hat, ngan pagtutdo hin matadong
nga pagkinabuhi.

Lucas 21:33

“Tigamni ini! Mahinanabo ini
ngatanan nga mga butang, ha
diri pa mapatay an ngatanan nga
mga tawo nga buhi yana.”

Salmo 119:11

Ha kasingkasing ko balaod
mo titipigan, basi diri ha imo
ako masalaan.

Mateo 22:29

Ginbaton hira ni Jesus; “Pag-
kasayop niyo! Tungod ini nga
diri kamo maaram han Kasura-
tan o han gahom han Dyos.”

Published in numerous languages by the World Missionary Press
as God supplies funds in answer to prayer. If you would like more
copies for careful distribution, write in English to:

World Missionary Press, Inc.
Box 120
New Paris, Indiana 46553 U.S.A.

Philippines

Northern and eastern Samar-Leyte

WRY

135 Waray
Printed in USA

2M

0